

Museo Historico a haci apertura oficial di su exposicion nobo



ORANJESTAD -- Museo Historico a haci apertura oficial di su exposicion nobo cu aki a tuma luga den presencia di su excelencia Gobernador Fredis Refunjol, Minister Michelle Hooyboer Win-



klar, Minister Paul Croes y presidente di Parlamento Sra. Marisol Lopez Tromp. E proyecto tabata hopi valioso pa Museo ya cu un di e obheccionnan primordial di Museo Historico ta pa trece publico mas cerca di Museo su actividadnan. Museo Historico su empeño ta pa no solamente preserva y presenta herencia cultural di nos isla pero pa envolbe comunidad di Aruba den conoce, comparti y salvaguardia esaki. Hoben ta haya atencion special den e obhetivo aki. E tarea di e hobennan cu a traha cu Museo Historico no solamente a duna e bunita resultado cu ta visibel den e exposicion pero tambe a percura cu den nan seno familiar mes a estrecha lasonan familiar, a combersa di historia di nan famia y a percura pa e hobennan sa un tiki mas di unda nan a bin. E 20 asina yama, Agentenan Special y nan famia duran-

te e apertura a admira nan trabou pa di prome biaha. Nan tabata sumamente orguyoso di por a presenta e resultado di nan mision cu publico y cu animo tabata duna detaye na tur es nan cu tabata kier sa mas. Admirando e exposicion hopi recuerdo y storia a bin laira cerca hopi di es nan presente y surgi un ambiente ameno di comparti recuerdo di temponan aya. Hoben y adulto a uni na un forma masha special danki na esaki. Museo Historico ta invita un y tur pa bin admira su exposicion y admira e trabou inspiracion y creativo di nos hobennan. Aparte di su orario regular den siman di 9 pa 5, Museo lo habri dos diasabra pa luna pa asina duna mas oportunidad na publico local di bishita nos expo. E proximo oportunidadnan lo ta diasabra 1 di Februari y Diasabra 15 di Februari proximo di 10'or di mainta pa 4'or di atardi. □